



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՈՍՏԻԿԱՆՈՒԹՅԱՆ
ՊԱՐԵԿԱՅԻՆ ԾԱՌԱՅՈՒԹՅՈՒՆ**

0090, ք. Երևան, Շոպրոնի 77, Հեռ.

N 91/2384

< 21 > 02 2022թ.

Տիգրան Առաքելյանին

Հասցե՝ ք. Երևան, Դավթաշեն 1 թաղ. 11, բն. 34

Ուղարկում եմ ՀՀ ոստիկանության պարեկային ծառայության իրավաբանական բաժանմունքում վարչական մարմնի նախաձեռնությամբ հարուցված վարչական բողոքարկման վարույթի արդյունքում կայացված <<Թիվ 8180070764 որոշումն անվավեր ճանաչելու մասին>> որոշման օրինակը:

Առդիր՝ <<2>> թերթից:

Հարգանքով՝

Պետ, ոստիկանության գնդապետ՝

Ա. ՈՒՄՐՇԱՏՅԱՆ

Կատարող՝ Ն. Քոչարյան
Հեռ. 010304202

Ո Ր Ո Շ ՈՒ Մ

ՀՀ ոստիկանության պարեկային ծառայության վարչական իրավախախտման վերաբերյալ գործով 18.12.2021 թ.-ին կայացված թիվ 8180070764 որոշումն անվավեր ճանաչելու մասին

18.02.2022թ.

ք.Երևան

ՀՀ ոստիկանության պարեկային ծառայության պետ, ոստիկանության գնդապետ Ա. Ումրշատյանս, ղեկավարվելով <<Վարչարարության հիմունքների և վարչական վարույթի մասին>> ՀՀ օրենքի 67-րդ հոդվածով, վերանայելով 18.12.2021թ. կայացված թիվ 8180070764 որոշումը,

Պ Ա Ր Զ Ե Ց Ի

2022 թվականի հունվարի 18-ին ստացվել է ՀՀ ոստիկանության պարեկային ծառայության Երևան քաղաքի գնդի 2-րդ գումարտակի հրամանատար, ոստիկանության փոխգնդապետ Լ. Բադալյանի զեկուցագիրն այն մասին, որ ՀՀ ոստիկանության պարեկային ծառայության Երևան քաղաքի գնդի 2-րդ գումարտակի 2-րդ վաշտի կրտսեր պարեկ Եղիշե Ալեքսանյանը 2021 թվականի դեկտեմբերի 18-ին՝ ժամը 02:40-ին, Երևան քաղաքի Պարոյր Սևակ փողոցում կանգնեցրել է «ԲԵՄՎԵ» մակնիշի 37 LD 305 հ/հ-ի տ/մ-ն և ստուգմամբ պարզվել է, որ վարորդը՝ Տիգրան Գարեգինի Առաքելյանը, տ/մ-ն վարում է չունենալով տվյալ կարգի տրանսպորտային միջոց վարելու իրավունքի վկայական, ինչպես նաև գտնվում է ոչ սթափ վիճակում: Փաստի առթիվ կազմվել է վարչական իրավախախտման վերաբերյալ արձանագրություն՝ <<Վարչական իրավախախտումների վերաբերյալ>> ՀՀ օրենսգրքի (Այսուհետ՝ ՎԻՎՕ) 128-րդ հոդվածի 1-ին մասի հատկանիշներով՝ չունենալով տվյալ կարգի տրանսպորտային միջոց վարելու իրավունքի վկայական տ/մ-ն վարելու համար և կայացվել թիվ 8180070764 որոշումը՝ քաղաքացի Տիգրան Գարեգինի Առաքելյանին տուգանելով 25.000 ՀՀ դրամի չափով:

Զեկուցագրում նշված հանգամանքները հաստատվել են նաև կից ներկայացված վարչական իրավախախտման վերաբերյալ արձանագրությունների և թիվ 8180070764 որոշման պատճենների ուսումնասիրությամբ:

ՎԻՎՕ 9-րդ հոդվածի 2-րդ պարբերությունը սահմանում է, որ սույն օրենսգրքով նախատեսված իրավախախտումների համար վարչական պատասխանատվություն առաջանում է, եթե այդ խախտումները իրենց բնույթով քրեական պատասխանատվություն չեն առաջացնում գործող օրենսդրությանը համապատասխան:

<<Վարչարարության հիմունքների և վարչական վարույթի մասին>> ՀՀ օրենքի 63-րդ հոդվածի 1-ին մասի <<ա>> կետի համաձայն՝ անվավեր է առ ոչինչ չհանդիսացող այն ոչ իրավաչափ վարչական ակտը, որն ընդունվել է օրենքի խախտմամբ, այդ թվում՝ օրենքի սխալ կիրառման կամ սխալ մեկնաբանման հետևանքով:

Նույն օրենքի 77-րդ հոդվածի 1-ին մասի <<ա>> կետը սահմանում է, որ 63-րդ հոդվածով սահմանված հիմքերը վարչական ակտի փոփոխման կամ բեկանման հիմքեր են:

<<Վարչարարության հիմունքների և վարչական վարույթի մասին>> ՀՀ օրենքի 67-րդ հոդվածի համաձայն՝ վարչական մարմնի ընդունած վարչական ակտի վերաբերյալ բողոքի բացակայության դեպքում այդպիսի ակտ ընդունած վարչական մարմնի վերադաս վարչական մարմինը (պաշտոնատար անձը), վերահսկողության կարգով և իր նախաձեռնությամբ, իրավունք ունի վերանայել ստորադաս վարչական մարմնի ընդունած վարչական ակտը:

Տվյալ պարագայում ՀՀ ոստիկանության պարեկային ծառայության Երևան քաղաքի գնդի 2-րդ գումարտակի 2-րդ վաշտի կրտսեր պարեկ Եղիշե Ալեքսանյանը 18.12.2021թ.-ի թիվ 8180070764 որոշումն ընդունել է օրենքի սխալ կիրառմամբ, այսինքն՝ ընդունել է ոչ իրավաչափ վարչական ակտ, քանի որ քաղաքացի Տիգրան Գարեգինի Առաքելյանի կողմից տրանսպորտային միջոցը ոչ սթափ վիճակում և առանց վարորդական իրավունքի վկայական վարելը նախատեսում է քրեական պատասխանատվություն, ուստի թիվ 8180070764 որոշումը ենթակա է անվավեր ճանաչման և բեկանման:

Ելնելով վերոգրյալից և ղեկավարվելով <<Վարչարարության հիմունքների և վարչական վարույթի մասին>> ՀՀ օրենքի 63-րդ հոդվածի 1-ին մասի <<ա>> կետով և 67-րդ հոդվածով՝

Ո Ր Ո Շ Ե Ց Ի

1. ՀՀ ոստիկանության պարեկային ծառայության վարչական իրավախախտման վերաբերյալ գործով 18.12.2021թ. կայացված թիվ 8180070764 որոշումը ճանաչել անվավեր:
2. Որոշման պատճենը երեք աշխատանքային օրվա ընթացքում հանձնել Տիգրան Գարեգինի Առաքելյանին և ՀՀ ոստիկանության պարեկային ծառայության Երևան քաղաքի գունդ:
3. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան օրենքով սահմանված կարգով և ժամկետներում:

Պետ, ոստիկանության գնդապետ՝



Ա. ՈՒՄՐՇԱՏՅԱՆ